

OLA

PULETINI A'OGA

15 IUNI 2015 ~ LOMIGA 18 ~ UPEGA TAFAILAGI: www.ola888.com ~ TUATUSI FESOOTA'I: saili.niupac@gmail.com; evaleon.books@gmail.com ~ E le faatauina ~ A FREE PUBLICATION

e faasoa faamatalaga mo a'oga i le gagana Samoa

www.ola888.com

Tala faasolopito

Aiga Stunzner



Lauferu a Samoa:

O Aitu o le
Taeao



~ Tusiga tala ~

E fiafia e faasilasila atu la tatou tauvaga tusigatala mo le faailogaina o le 5 tausaga o le OLA Puletini Aoga.

E tolu vaega e faaulu mai ai:

1. tauvaga a le fanau a'oga, Tulaga lua
2. tauvaga a le fanau a'oga, Kolisi
3. tauvaga soo se tasi

Ulutala: Pule oe i lau ulutala

Umi o le tala: 1000 i le 2500 upu

Gagana: Samoa

Aso e faagata ai: 6 Setema 2015

Lafo mai loa i le tuatusi:

evaleon.books@gmail.com

Poo le Itavita8@gmail.com

O le a saunia ni faailoga lelei.



Faailoga: E fia faailoa ma le faafetai galuega ma meatotino a isi e ana puleiata o ata ma faamatalaga o loo ua nonoina e le OLA mo lana lomiga lona 18. E faamanatu atu ai ma le faaaloalo le taua o le pui-puiga i lo latou faaogaina i ni faiga e soli ai le tulafono.

Toe Tu ma Vaai



E le o Napoleone ina ua faia'ina i le taua i Waterloo a o Keven le toeaina o le Blues ua sauni e fai se malologa. Tele tausaga o ona ta'ita'iina le Blues ma le Olopeleki i ni manumalo mata'ina, a ua le tali mai lana autau i lea itula faaiu. Malo le taalo, patipati fiafia tamaiti i lou a'e malo. Ata.TVNZ

Nisi o tofiga fou ma faamamaluga mo tamaitai Samoa

E 145 le aofa'i o talosaga na faatau atu i le avanoa o le Ta'ita'ifono, ae na autasi le filifiliga i le tamaitai o Barbara Alaalatoa (ata ma le fanau i lalo), o ia o le a avea nei ma kapeteni fou o le Fono o A'oga a Aotearoa (Education Council of Aotearoa).

Na faaalua e le tamaitai faia'oga lona faate'ia ae ua na folafola foi lona sauni e fai ni suiga, e avea ai fanau ma faamuamua i soo sana filifiliga e fai.

Na ia ta'ua foi o se lu'i mo ia le faatinoina o lea tiute faatasi ma lana galuega o loo fai nei, o le pule o Sylvia Park i Aukilani.

I le tausaga talu ai na agiga ai tala manuia o lana galuega i totonu o lenei a'oga, e iai ona siitia ausiga a le fanau i se taimi faatauva'a talu lona ulufale.

Faatasi ma Alaalatoa le tofiga o le tasi foi alo o le atunuu, Iva Ropati, e avea o se tasi sui o le aufono e to'avalu.



Tagaloatele Peggy



Tuiataga Faafua

E pei ona silafia, o le tasi lenei Fono taualoa i totonu o upufai o A'oga. O latou nei e leoleoina le amio pulea ma faia faaiuga faigata e aafia tonu ai faia'oga ma tamaiti.

I lenei foi vaitau o le faamamaluina o tautua ua afulelea i a'oga, isi foi tamaitai Samoa.

O Tagaloatele Peggy Fairbairn-Dunlop ma Tuiataga Faafua Leavasa-Tautolo na la tauaoina le pine taualoa o le New Zealand Order of Merit.

Faatasi ai foi ma se tamalii Samoa ma lona faletua, Pulotu Arthur Gus ma Maretta Solomon, na laua maua foi lea lava pine e tasi. Maeu foi tala o a latou tautua e pei ona talapipi e le Samoa Times i lana lomiga na se'i tuana'i.



Ripoti o le Vaiaso:**Avea mafutaga ekalesia ma sulufaiga i taimi faigata**

O le molimau lea a le tina ia Silotomua Tuilimu i le sauniga faaleaiga o lona alii, Lealiiee Raymond Tuilimu i le po o le Aso Faraile na se'i mavae. Na ia faailoa ai le taua o lana aulotu o se malu i taimi o puapuaga, ina ua tatata le mafutaga ma le tamā o le aiga e le maliu.

O le Tofa ia Lealiiee ma le tasi ia Silotomua o ni matua e maeu le lagolago i a'oga a o laua alo, aemaise lava i polokalame e fa'aaoga ai le gagana Samoa. E to'alima o la alo na ulufale uma i le Lunite Samoa a le O le Taiala i le A'oga a Finlayson Park i Manurewa.

O le Aso Toonai na fai ai lona toe sauniga i lana uarota i Manurewa, ma faamavae atu ai le tina, le fanau, aiga, uo ma pa'aga faalegaluega ia te ia.

E le itiiti ifo i se 80 pasene o aiga Samoa o ni sui auai o mafutaga lotu i totonu o lenei atunuu.

O le mea lea e talitonu ai le taofi o loo lelei malutia



AIGA TUILIMU: Mai le itu agavale: Silotomua, Lealiiee Raymond, Raymond Jnr, Patrick, Arlene, Trudyann. Pito i luma: Shirley, ma se tasi o latou tei. O Arleen sa fai foi sona sao i lenei puletini i se vailau na ia saunia mo le fanau laiti.

lagona o fanau i taimi faigata ona o lea lagolago faitele, e le gata mai aiga, a o mafutaga e iai ekalesia ma faalapopotoga lotu.

Na malii Lealiiee a o alo i se fa'aagatama e maua ai le faamalositino, e lei manino mai le mafuaaga tonu. Na o le 45 le matua o le soifua, e lei gasegase pe faataotolia.

E iai nisi tamā talavou i le matua lea ua maliliu, e tali tutusa lelei a latou tala ma le

tamā ua amia. E foliga e malolosi, e leai ni foliga o se gasegase, ae faafuasei lava le aveesea.

E feagai le usuia o le fono ma le vaiaso tonu o le savali o le faatauaina o le ola maloloina o tamā a Niu Sila.

Tau ia ina faamaise le Atua i le tina ma le fanau, uo ma aiga faanoanoa ua tuua.

Faao atu foi le faamaisega i nisi o a tatou aiga faitau o loo feagai ma faanoanoaga.

Taumate pe faamata na oo le fe'au alofa i tamā Pasefika

O le vaiaso na se'i tuana'i na logo ai tulimanu o Niu Sila i le savali, 'e taua le ola maloloina o tamā.

Na mafua ai ona fesiligia nisi o tamā talavou i so latou taofi i le mataupu.

"Se, ou te le iloa lava e a'u se na faasalalauga, ou te le matamata TV e leai foi se leitio, o le tali lea a le tasi.

O le isi tamā talavou sa maua i lana faafofoga ae faapea mai lana tali e maumau lava tupe e fai ai na faatosina ae leai lava ni

isi e ano i ai.

O ia o se tamā talavou Samoa ma o lana tali e atagia ai le tulaga moni o le mea o loo tupu, ma le uiga faaali o le tele o tamā Samoa pe a talanoa i lenei mataupu.

Fai mai le mau tusia, e ta'i 90 minute ma oti se tasi i se ma'i o le fatu i totonu o Niu Sila. E le faailogaina se tasi, e fa'i le matua ma le moto, vaivai ma le malosi. O lea ua avea ai ma'i o le fatu ma fili numera 1 i le soifua manuia.

E mafua lea i taumafa. Mo tagata Pasefika, o loo

fautuaina pea e tusa i le soona tagofia o mea'ai ga'oa ma na e tele ai le masoa, le suka ma le masima.

E 258,000 i latou e maua i ma'i o le suka, 12 pasene o lena o tagata Pasefika.

Faaopoopo lea i ai ma le leai o se faamalositino e mana'omia e le tino, ma atili ai ona lamatia le soifua.

E pei ona molimau foma'i, e le faigofie ona mateia faailo o le osofaia o le fatu. O le mea lea e taua ai le asiasi pea i le foma'i, auā o le avanoa lena e su'esu'eina ai ma iloa tonu le tulaga maloloina o loo iai.

OTOOTOGA**Se tusi taiala aogā**

E talitonu e le faatauavaa le aogā o se tusi e lagolago ai matua i le faatonutonuina o ala o fanau i le fa'aaogaina o le initaneti.

O lea tusi na saunia e le alii pule o Shaun Brooker. O Brooker o le pulea'oga a le Kolisi Kerisiano o Elim i Aukilani. Na ia saunia le tusi *Keeping Your Child/Teen Safe in the OnlineJungle*.

O se fesoasoani i matua i le taua faasaga i ata ma faamatalaga matagā ua tumu ai luga o le laina o sootaga.

Faaauau pea finauga

Ua sauni le Komisi o A'oga Faalelotu (CEC) e oso i totonu o le maea a o faaauau le finauga o loo fai nei i le va o e lagolagoina le faaauau pea o A'oga Tusi Paia i totonu o a'oga, ma le vaega lena o loo tetee.

Ua talia e le faamasino le talosaga a le CEC e fai sana molimau. E 667 a'oga o loo faatautaia e le CEC a latou polokalame—a'oga Tusi Paia.

Fa'alo mulimuli

O le aso ananafi na faamamaluina ai Jerry Collins e lona nuu o Porirua e ala i se savaliga sa auai ana uo, aiga ma le loaloa o lea aai, i lana fa'alo mulimuli mai, ma le faatofa atu a e ua tuua.

O ataeao lona sauniga faaleaiga, a o le Aso Lulu e faatofa atu ai i se tasi a tatou fetu lakapi ta'uta'ua mo le taimi mulimuli.

O le tala fiafia ona ua vaaia e foma'i se suiga malie i lona afafine pepe o Ayla.

E le tauilo o le a manatua lenei alii o se toa manumanu o le malae,

o se foi e alofagia e le au maimoa, mo se taimi umi lava.



Faasoa o le Vaiaso:

O le sini o le a’oga fesilisili o le malamalama

O le upu i le gagana Peretania ‘Inquiry Learning’ o loo ua avea nei ma auga o aute i le utuvagana a a’oga i nei aso. Ua faaliliuina e lenei puletini i le A’oga Fesilisili, talu ai lona uiga e le nofonofovale le tamaitiiti a’oga ma le faia’oga foi, ae fesili ma saga fesili e maua ai le malamalama.

O se suiga lenei i le vaai e mafua i ni tofa manino o lenei foi talutalufou, e teena ai le taofi tuai, e faavae i le mau o le tamaitiiti o le ipu e gaogao ii, a o le faia’oga o le punavai taumasuasua. E usu mai le fanau (ipu) ona faatumu lea e le faia’oga i le poto ma toe sau foi i le isi aso e toe utu atu.

Ua taumafai nei e teetee atu sea taofi talu ai ua iloa e le se ipu fai’au le atalii po o le afafine, o tagata ola, e fia auai foi i le utuga o o laua atamai.

Faapefea la ona utu? E utu i le fesili ma faataufesili. Fesili i le faia’oga, fesili i isi, fesili i le tusi, fesili ia te ia lava. E faapena foi le faia’oga i le tamaitiiti. O lea faiga e mana’omia ai le onosai ma le lava papale o le faia’oga auā e au ina fefinaua’i, ma oo atu ai i nisi tulaga e mafua ai ona ‘alofia sea auala.

Feiloa’i mai i le alii o Eric, 12 tausaga o Aukilani. Na maua se fesootaiga ma Eric. Fai mai se tasi fasi upu a le tama o Eric, ‘e le fiasia lo’u faia’oga ia te a’u leaga ou te tautala i le vasega.’

Ua faalua ona aami ona matua e le a’oga i ni moliga e tuua’iina ai ia i le ulavale ma le faalavelave, o ni tuua’iga e manatu ia e le faamaoni.

I le tala a Eric (ua sui lona igoa moni e puipui ai), e fiasia i lona faia’oga sa iai muamua. E una’i lava latou e fesili ma tautatala i taimi e talanoaina ai se autu. Ae ina ua alu lo latou faia’oga i le isi a’oga, ona sui mai lea i se tasi faia’oga lea o loo mafua ai nei le va.

E foliga mai i le upu a Eric e le fiasia le faia’oga i ni tamaiti ae fesili soo pe tautatala soo. O le mea ua tula’i mai ua pei se sãõ o loo fai, ua gugu uma tamaiti, o le faatusa lava lea a Eric; a talanoa i kulupu e tuumumusu ne’i te’i ua to’atama’i le faia’oga.

Na o ia lava e le taliaina lea suiga, e leotele lava ia ma fesili ma toe fesili ma saga fesili. A ua avea ma mea ua tuua’iina ai. Ua le iloa e Eric le mea a fai. A o ona matua foi e masani ona faapea ane ia te ia e toaga e fesili i le faia’oga pe a le malamalama. Ua tau masalosalo foi pe mafua ona o le faiga o ana fesili pei se loia pe a.

I le mataupu a Eric tatou te iloa ai le maoa’e o le tata’i a le faia’oga i le ola

a’oga o soo se tamaitiiti i lalo o lana vaaiga. Afai o se faia’oga e ilitata i le pisa, o lena foi e faavae ai sona lagona patino i soo se pa’o po o se leo e faalavelave. Afai foi o se faia’oga e masani i le pisa, e feagai pea ma luitau o se potua’oga e talanoa tagata uma.

Pau lona eseese, o auala e pulea ai e faia’oga e toalua o la potua’oga.

I le iuga, e sili i le tasi le filemu ma foi tamaiti ma sina mea i le fale, i lo le tuuavanoa ma sao ai uiga le pulea. A o le isi e le ano i le faalavelave a le lauamanu ae mata’i le faamuli o atu.

Ae manatu nisi o le aufaiuta (mea taua’oga) e mafai lava ona tausisia le paleni. Auā o mea e lua aupito sili e tatou ona ‘alofia i se potua’oga o le filemu ae lē malamalama, ma le pisavale pei e tele ni mea o fai, ae uma ane e leai se mea anoa na maua.

I le a’oga fesilisili e tilotilo ai ma le toto’a i le mafuaaga o se mea, i fesili, Aisea? Faapefea ona maua lau tali?

I le faiga tuai e mafuli le a’oga e ala i fesili masani: O le a na tupu? O ai?

Ae mafai ona tosina le fanau e a’o le Saienisi ona o le fia iloa o le mafuaaga o se mea (Aisea? Faapefea? O le a sou manatu?).

E le siligia le atamai taofi o alo ma fanau a Samoa. O lo latou malosiaga lea auā e faalogo ma amio pulea le toatele. A o se fili mo nai fanau vaivai toe lē fesili, se lesona e fai ma le le malamalama. O se fetuu foi mo fanau atamamai e tele fesili o nonofo ma latou, a ua taofia ona o le manatu e le fiasia le faia’oga. E ono faauiga le fesili o se lu’i poo le fiapoto i lana susuga.

A tatou fia maua ni saienitisi maoa’e, ni e su’esu’e tulaga ese, e foaina ni mea fou ma ni faiga fou i le lumanai, o le taua lea o le vave atia’e o o latou tomai fesilisili a o laiti.

I le fatu o le A’oga Fesilisili le agaga fia malamalama. O iai i le faia’oga tomai e atia’e ai lea agaga ina ia saga faamallosia ma mu tele pei se afi. Faapefea? E ala i ituaiga fesili e fesili ai, mo se faata’ita’iga.

E moni, o iai le tau e totogi i le pisa ma tulaga na, ae sili ona taua le sini, o le malamalama. Auā a malamalama, ona fua mai lea i ausiga e faafiafiaina ai fanau, faia’oga ma tagata uma.

“mafauauga o le vaiaso”
Amuia e faanoanoa . . Iesu Faaola

Manatu o le aufaitau:

Gagana o le tofi e manumanu i ai

“E aoga faailoga i le a’oina o le faitau tusi a tamaiti laiti. Afai loa e masani ona tatau lea ona ave ese ae faamasani i le na o mataitusi. Vagana le mea e tatau ai.” (Faia’oga)

“E pei ua ova faata’ita’i le tusiga o le tatou gagana i le tusiga faaPeretania ae le tatau ona tutusa. E ese lava le gagana Peretania ia ese foi tatou. O tatou e iai le tulaga o le ‘O’ na o ia, e pei o le Ko i isi gagana a le Pasefika. E tatau lava ona tausia pea, o le mea lena e iloa ai foi la tatou gagana.” VTL

“O a’u na aoga mai i le faiaoga e leai ni faamamafa e faia ae ou te iloa lava le eseese o le tama (boy) ma le tama (father) pe a ou tilotilo i le fuaiupu.” RT, Tausaga 8

“E foliga mai i le faiga fou ua taumafai e faaleo le ta’uga sa’o o le upu e aofia ai silapela pupuu ma uumi. Tagai la i le upu malie (funny), ua tuu ai le faamamafa i luga o le ā, ae a tula’i mai le malie (shark) ona leai lea o se faailoga e ta’u mai ai i lē o loo faitau e puupuu le leo o le vaueli. Pei foi o le leo o le ‘a’ pe a tali ioe se tasi. Fesili mai ae tali atu, A (e pei o le leo o le a i le apple). O ni lape na o le tausisi i faailoga, auā e le lavatia e faailoga ona faaleo tonu leo uma o le tatou gagana.” ALS

“A leai se faailoga ou te le iloa le eseese o le matai ma le mata’i, le lau ma le la’u. E tatau ona tausia pea faailoga.” MK

“O faailoga e aoga i tamaiti faato’a a’o le Pi Tautau ma tagata ese o loo tau a’o a latou sipela ma faaleoga sa’o o upu. E le aoga ia i tatou nei ua masani. E moni a nisi faasoa ua te’a, faamasani tamaiti i upu ae le o le faamoemoe i faailoga e faia lea feau i le taimi e faitau ai. TTW

Faatonu: Ua faagata ai le faasoa i lenei mataupu. Faamalulu atu pe afai ua sala se upu i lenei fetufa’iga.

E FETAUI LENEI TALA MO VASEGA MATUTUA



O aitu o le taeao



A o ou laitiiti sa matou nonofo ma matua o lo'u tamā. O le sa'o o lea faaupuga, o matua o le tamā o lo'u tamā. Na la faate'aina lo'u tamā a o laitiiti lava. Matou te nonofo i tai i le aai e tu matafaga. Na'o matou lava e toatolu le fale i le tele o taimi.

O se fale afolau telē, e paū ma taaligoligoa. Matou te fa'aaogaina le isi tala o le fale, ae tuu lava le isi itu e teu lelei e tali ai malo pe a asiasi mai i lo matou aiga. E tofu lava aiga o le nuu ma se fale afolau e pei o lo matou fale.

E si'o e nei fale le malae oneone ae tu ai i le ogatotonu se fale lapotopoto telē, o le fale lea e fai ai fono a matai.

Na vave ona ou iloina e malie uiga o le fale. I le tasi taeao po na ou lagonaina ai ni tagata o loo talanoa magamagagu i le paepae pito i luma. Na ou tepa a'e nei i luma ae leai se mea e iloa atu i le pogisa, e leai se masina.

Ina ua malama le taeao na ou fesili i lo'u tinamatua pe na ia lagonaina le pisa. Na faafiti mai o ia e leai. Ae na fesili mai, "E faape'i leo na e faalogoina?" "O leo o tagata matutua, ae iai le tagata e tale'ū", sa ou lagonaina foi le sasala o le manogi o ni tapaa Samoa," o la'u tali lea.

Na vave ona tu mai i lo'u mafaufau le ata o le toeaina o lo matou aiga e lei leva ona maliu; o le toeaina e tale'ū ae fiafia e ula tapaa Samoa i lana paipa. Sa matou iai i gauta i le aso na teu ai le toeaina i le fanuatanu o le nuu. Na ou vaai lava i ai a o tuu ifo lona tino i lalo o lona fanua e afifi i se siapo.

"E le iloa poo Tomasi, a ea?" o la'u fesili lea.

"Ae ā!" e le iloa poo si toeaina, 'ai na sau e asi mai tatou," o le tala lea a lo'u tinamatua ma 'ata'ata e foliga e le popole i ai. A ua oso ai ma lo'u pala'ai.

O lo'u tamāmatua na ou iloa ai e iai mea faapea e tutupu. "E tele aitu

e asiasi mai i le tatou nuu", o lana tala lea ina ua ou fesili i ai i le isi aso. "O aitu e popoto tele e faaPeletania, o isi e popoto e faaSiamani, o isi e faaFiti, ma isi mau gagana e tautatala ai."

"Manatua o lo tatou nuu sa tau mai i ai le tele o malaga i aso la. E pei o se taulaga e malolo mai i ai, ona faaaauai ai lea o se malaga i se itulagi e o i ai. Afai foi e toe taliu mai ona toe afea foi lea o lo tatou nuu. . . Ae leai se mea e popole ai fua", o le tala lea a lo'u tamāmatua.

I le tasi taeao po lava na ou te'i ai i le pisapisao e sau mai gatai i le matafaga. Ua tau vavala mai ata o le taeao ma na ou iloa atu ata lafoia o ni tagata se toatele o loo tumu ai le aloalo ma luga o le se'eti. E tutu isi ae punonou isi, ae taooto isi e foliga o loo fagogota.

Na ou manatua le meavaai a lo'u tamāmatua e masani ona ia mata'iina ai le tai. O loo tu le meavaai i autafa o lona 'ali. Na ou aapa lemu atu nei i ai, ua aumai ma ta'i loa aga'i i tai. Na ou fiu e autilo e leai ma se tagata na tau i ai la'u vaai. Ae a ave ese ona ou iloa atu foi lea o tagata.

Na ou fafaguina nei lo'u tamāmatua. Ua te'i a'e ma tilotilo loa i tai i le sami o loo tusi i ai lo'u lima. Na 'ata le toeaina ma faapea mai, "Ai foi o se malaga na afe mai o loo saili so latou gapia. A leai foi o nisi o tatou mai uta i le tuasivi, e masani ona o mai e fagogota."

Na ou ta'uina i ai le mea na tupu i le meavaai. Ona aapa mai lea o lona lima i le meavaai ma ta'i loa i tai i le sami. A o autilo na 'ata'ata ma faapea mai lana tala, "E sa'o lava a'u. Ana o ni tagata ola e te iloa atu i le meavaai, ae leai."

Na tuu ese e ia le meavaai ma toe faapea mai, "Ae malama a'e lava le taeao ma o atu ai."

Pe tusa ma se masina e va ai ae ou toe faalogoina foi tagata o loo talanoa i luma o lo matou fale. E

le'i misi la'u faalogo i le tale'ū a le tagata.

Ona tautala lea, "Na ou oso mai e vaai si toeaina ma si loomatua lea."

O Tomasi. O le leo o Tomasi. Ua sau ma le atoa lo'u pala'ai.

Na fesili le isi, "E toatele se aumalaga lea e o mai?"

"Fai mai e toatele, e fa fautasi.

Masalo pe atoa se vaiaso tatou te tali malo ai."

"E usu le nuu?"

"Oi, a le usu faafefea? E iai tamalii e malaga mai ai."

"Faamata la e lava mea e tali ai?" o le fesili lea a le isi.

"A le lava faafefea. E lava ma totoe. Ia se'i vaai i le fale telē o lenei toeaina."

Na tale le tagata ma na le toe faanenefu la'u mate, o Tomasi, o le uso o le tamā o lo'u tinamatua, lea sa ou vaai i ai i lona tanuga.

O le taimi muamua lea ua ou lagona lelei ai ni talanoaga a ni aitu.

Na mou atu leo i le 'ea a o a'u ua ese la'u faalogo i lo'u tino. Ua ou iloa nei o le a matou nonofo ma aitu i se taimi o le vaiaso o i luma.

Na maua ai foi ma le tonu. O a'u o le a alu i gauta e nofo ai i o'u matua ma o'u tei laiti. Na taliē lo matou aiga ina ua faalogo i la'u tala.

"Ua lelei foi lena, se'i alu atu si o'u atalii matou te tafafao, leaga o lea o le a malotia lo lua maota," o le tala lea a lo'u tamā ma taliē leotetele.

Mai i lo'u tamāmatua na ou maua ai se lesone taua, 'Aua e te fefe i aitu ae talanoa i ai. E le iloa poo se tasi o lou aiga, 'ai e fia talanoa mai i se mea taua.'

Sa faamatala muamua lenei tala, a ua toe lomina e manatua ai le alii faitifaga lauiloa o Christopher Lee, o lana taleni o le faata'ita'i o aitu leaga e pei o Saruman i le *Lord of the Rings*, ae sili ona manatua ia *Dracula*, tau le momoe ai tamaiti i aso ia. Maliu i lona 93 tausaga.





Sponsored by Evaleon Books

LOUTALA FA'ASOLOPITO SAMOA HISTORY

"Ne'i mea ane na galo"

Jakob Roggeveen



14—20 Iuni

14

1904 Malie Tui Manu'a tuu
atu Manu'a i lalo o le
pule a le malo Meleke

1889 Fono malo pule e tolu i
Siamani - Samoa

1722 Taunuu Rokeuaina i
Manu'a

15

1722 Vaaia Tutuila ma Upolu
e Rokeuaina

16

2001 TNS. Malo Niu Sila ia
Samoa, 50-6, North
Shore

1920 Taunuu i Apia le *Main*,
ave ai Siamani 190
o loo totoe

17

1927 Faaali taofi Nosworthy
nusipepa o le tatau ona
aveese uma papalagi
ma afakasi mai Samoa

18

1999 TNS. Malo Niu Sila ia
Samoa, 71-13, North
Harbour

Lauga Tofilau Eti i le
2AP mataupu tusifolau

1888 Faavae ulua'i lala
Mamona, Leone Tutuila

1881 'Tua o le Nusipepa'
i Saluafata (Tuvale)

1835 Faavae le misiona tala'i
Uesiliana i Manono

19

2000 Lagolago NZ Herald
le mataupu i le faama-
galo o tagata Pasefika
ova aso

1936 Umusa malumalu
Katoliko o Falefa

20

2007 Tauto Tui Atua Tupua
Tamasese Efi tauave
le tofi
Ao le Malo o Samoa

*Ata i luga: Jakob Roggeveen (Rokeuaina); Na uluai avatua
tala o Samoa I Europa; Le aiga Stunzner i le latou faatoaga
faaigoa o Tuvao, o lona faletua o Ellen Mary (nee Betham)*

Feiloaiga ma Faamavaega



Ina ua faoa le pule a Siamani i le 1914, ona amata faataoto lea o fuafuaga mo le toe faafoisia o o latou tagatanuu sa aumau i le atunuu. Ia Iuni aso 15, 1920 na saina ai e le ta'ita'i o le malo fou, Robert Ward Tate, le poloaiga mo le aveesea o i latou o totoe, ae taunuu le *Main* i le aso e sosoo ai e faataunuu.

E lei faigofie le toe foi o nisi, molimau faamau o le tala faasolo i tautinoga a i latou na aafia tonu i lea faaiuga. Aemaise e ua mautu nofoaga ma tamaoaiga e tua i ai. E pei o le tala i le aiga o Friedrich 'Fritz' Stunzner (ata), le tufuga ta'uta'ua na fauina le faletalimalo Siamani—le Casino, le falema'i, ma le fale faamasino—avea nei ma mata'aga—o loo tu pea.

Faaaunuu i Niu Sila, faafoi i Siamani i taimi o le taua muamua. Ave faamalosi e le malo fou lo latou fale ma meatotino. A o i Siamani e misi e le fanau Samoa sa fananau ai. Na mafua ai ona talosaga e toe fia foi mai. Na talia le talosaga ma faapea loa ona toe tuuvaa le aiga mo Samoa. Sa tausia se faatoaga o le igoa o Tuvao. Ina ua 'auma'ia ona toe taliu ai lea o Frits ma lona faletua i Siamani i le fautuaga a famai.

E 190 na toe faafo'i i Siamani. I le lisi o i latou na faafo'i e aafia ai suafa nei: Anton, Arps, Hummel, Keese, Peters, Sabiel, Sauer, Schefezzk, Schneider, Schon, Schmidt, Schroder, Shulz, Klampackel, Klein, Kruse, Lange, Lux, Mann, Margraff, Meyer, Mohr, Muller, Vogel, Wegener, Witenz. O le na muamua ave ese mai Samoa o le alii kovana o Erich Shultz.

Sa fesoota'i pea i latou ma aiga ma uo i Samoa.

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING



Telefoni (09) 269-6186. Emeli: evaleon.books@gmail.com

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomia i so'o se sionara o fatuga.

Sponsors:

New Zealand
Lottery Commission

Evaleon Books &
Niupac Publishing

Wheeler's Books
(NZ)




Sini Autu: Ia sa'o faaleoga o a'u vauei


Alaga'oa e a'oa'o ai: ata

Vaai i le ata ma ta'u le igoa.

1.



2.



3.



4.



Aofa'i o a'u tali na sa'o =

Fale Fauupu:

O meafaigaluega e
lagolago ai galuega
faatino:

O le lisi o upu:

1. ata

asu

esi

i'a

2. ato

apu

api

ofu

O ni fesili:

1. Pe na sa'o lelei le
faaleoga o a'u upu?

2. Pe na sa'o lelei la'u
faaleoga o le vauei
muamua?

3. O a ni isi upu
masani ou te iloa lelei
o latou faaleoga?

UILI FAU UPU

Saili tali o fesili o lo’o i lalo.
Pule oe pe sipela i luma
(clockwise) po’o tua
(anticlockwise).
E sa le feosoosofa’i.



1. Ta’u mai ni soa se tolu
o le *malu* i le Igilisi:

2. Saili ni fausaga o le
upu *taula*


3. Su’e le upu *taumalua*;
tusi sona faamatalaga:

4. Tusi uma upu/
fuiupu e ta’i 4-8
mata’itusi, ma o
latou soa i le Igilisi
(E faitau ai ma upu
ta’ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

PASO I GAGANA E LUA

Faatumu le paso i upu/igoa Samoa. Fill the
crossword box with **Samoa** words / names
—unless stated otherwise.



Faalava~Across

- 1 move (4)
- 3 be far-reaching (of
tree foliage (6)
- 6 law: to sue (2)
- 7 request (5)
- 11 scatter (7)
- 12 load to carry (5)
- 15 sea urchin (6)
- 16 Rugby: Alapati
Who (5)
- 17 be tired of (3)
- 20 journey (6)
- 23 miss (the bus) (4)
- 24 tea (2)
- 25 opportunity 6)
- 26 remove pods
as in fried cocoa
beans (4)

3 chess game (2)

- 4 four (2)
- 5 sun (2)
- 6 a type of dance (4)
- 8 black (6)
- 9 alliteration (5)
- 10 written (5)
- 13 group (5)
- 14 fold (of hand etc) (5)
- 17 stem of taro (2)
- 18 held (by) (4)
- 19 visited (4)
- 20 first to the line (3)
- 21 tomb (3)
- 22 gum (3)

Lalo~Down

- 1 Bible: Zion (5)
- 2 walk briskly (5)



SUDOKU #18 (TAALOGA I NUMERA)

1	2				6		8	9
			7		9			
	8	9	1			4	5	
		4		6	5		9	7
3		5				2		4
8	9		2	1		3		
	3	1			2	9	7	
			9		8			
9	7		5				4	2

Fa’atumu
pusa numera
(tama’i
sikuea) i
fuainumera
1 i le 9.
Ia uma ane le
galuega ua
maua atulaina
ta’itasi
(tu, fa’alava)
o iai le 1 i le 9.
E tofu le
atulaina ma
lona
fa’atulagaga
e ese mai le isi.

FAIGOFIE / FEOLLOLO / FAIGATA

©sudokuessentials

TALI GALUEGA OLA 17

UILI FAU’UPU 17

- 1. matau—observe;
matau—notice; matau—
fish hook
- 2. matau & ona fausaga:
mataua, matauina,
mataulia, matauga
- 3. mata’utia (soanauna).
Tulaga ese le leaga, le
lelei po o le malosi foi;
ogaoga le tulaga . E
mata’utia le sau o le
tupu. E mata’utia le
malosi o le tatou ‘au lea
ua iai.

- 4. matau—count; mata’u—
dread; mata’u—respect;
mata’u—mean; tama’i—
foal; tama’i—little; atamai—
clever/wise; amata—start;
māta’utia—fearsome, mnf

TALI SUDOKU #17

1	6	7	4	5	9	2	3	8
5	2	8	3	1	6	4	7	9
9	4	3	7	8	2	1	5	6
2	9	4	1	3	5	8	6	7
3	5	1	6	7	8	9	2	4
7	8	6	2	9	4	3	1	5
4	3	5	9	6	1	7	8	2
8	1	2	5	4	7	6	9	3
6	7	9	8	2	3	5	4	1

Jerry Collins

Aso fanau: 4
Novema 1980;
mataupu e lelei
ai i le a’oga o le
Numera; mnf



TALI PASO #17

S	O	K	A	T	A	F	O	L	A
I	O	M	A	A	A	A	P		
O	L	A	G	A	U	A	P		
N	L	T	O	F	A	I	N	A	
E	L	E	G	I	I	T	T		
E	A	F	U	I	U	P	U		
M	A	S	U	A	F	A	A		
G	T	P	I	O	A	A			
M	A	L	A	M	A	F	I	L	I
O	O	O	P	E	E				
A	L	U	M	I	A	A	T	U	A

© PasoSamoa.1988

Ata: Ta’u mai le suafa ma se tala lata mai e uiga ia te ia.
O le a sou manatu i le fusu a le tama lea? Faamatala.

POLE MA PAPA





O le OLA o se tautua e fia fai sona
sao i le fa'aaogaina ma le faauualoaina
o le Gagana Samoa ~

Ae mana'omia ona ta'u atu, pasi atu,
momoli atu sana fesoasoani i
potua'oga, aiga, aai, nuu, ma soo se
mea e aogā ai—i soo se itulagi ~

E taua lau fesoasoani.

Faatasi ma isi tausimea a le gagana,
e tasi le faafitiga, ia faaolaola ma
faaaoga pea la tatou gagana, auā
fanau lalovaoa ~

O la ta gagana o lo ta'ua tofi mai le
Atua, e tuufaasolo a tupulaga ~

O le faavae latou te tutū ai ma le
mautinoa, 'ai suiga ma lu'itau a le
taimi.

www.ola888.com

E maua lelei le manino o le upega
o i luga pe a faaaoga le google chrome



Faupu:

O nai ta'iala e fesoasoani i le faaleoga tonu

E lagolagoina le mau e mafuli le
alosasi o le faaleoga i vaueli molemole
poo na e vaivai o latou ta'uga, aemaise
pe a tutu i amataga o upu. Ae talitonu
foi afai e lava le taimi e faamasani ai le
fanau i leo na, ona vave alofia lea o se
numi e tulai mai i se taimi mulimuli.

I se matauga (su'esu'ega) a le OLA e
fia iloa pe o le a se tele o nei upu e
amata i vaueli lamolemole, e iai
faaiuga nei (Sa faaaoga le lomifeiloi a
Milner, e faatino ai):

1. **a.** E 351 upu mai le faamau
aofai e 1187. Tusa lea ma se 30
pasene. O le isi 836 (70%) e
amata i le leo tauave masani.
2. **e.** Na o le 27 upu mai le faamau
aofai e 94. Tusa ma se 25 pasene.
3. **i.** E 147 upu mai le faamau aofai
e 248. Tusa lea ma se 59 pasene.
4. **o.** E 132 upu mai le faamau
aofai e 287. Pe a o se 45 pasene.
5. **u.** E 277 upu mai le faamau
aofai e 392. Tusa ma se 70
pasene.

A faaopoopo leo vaueli o faaleoga
lamolemole e 934, mai le faamau aofai
e 2208 (faitauga e aupito lata i ai). O le
isi 1274 o leo ma'ai (tauave), poo na e
malolosi o latou faaleoga.

E tasi se mea na maua mai i lenei
su'esu'ega laitiiti, E foliga mai e le telē
naua se na numera, ma e mafai lava
ona a'oina e le fanau se vaega tele o
na upu, pe afai e faataoto se fuafuaga
faagasolo a le faia'oga e faatinoina ai.
O le a tatou tilotilo i ai i ni auala e
faataunuu ai i le vaiaso fou.

